

01

《出下馆诗》

谢朓

麦候始清和，凉雨销炎燠。
红莲摇弱荇，丹藤绕新竹。
物色盈怀抱，方驾娱耳目。
零落既难留，何用存华屋。

02

《和湘东王首夏》

萧纲

冷风杂细雨，垂云助麦凉。
竹水俱葱翠，花蝶两飞翔。
燕泥衔复落，鶺鴒吟敛更扬。
卧石藤为缆，山桥树作梁。
欲待华池上，明月吐清光。

03

《五日望采拾诗》

王筠

裁缝逗早夏，点画守初晨。
绡紈既妍媚，脂粉亦香新。
长丝表良节，命缕应嘉辰。
结芦同楚客，采艾异诗人。
折花竞鲜彩，拭露染芳津。
含娇起斜盼，敛笑动微嚬。
献珙依洛浦，怀佩似江滨。

须待恩光接，中夜奉衣巾。

04

《夏夜独坐》

萧子范

节序值徂炎，兹宵在三伏。
凭轩伫凉气，中筵倦烦燠。
寂寞对空窗，清疏临夜行。
虫音乱阶草，萤光绕庭木。
帘月度斜辉，风光起馀馥。
一伤年志罢，长嗟逝波速。

05

《五日诗》

魏收

麦凉殊未毕，蜩鸣早欲闻。
暄林尚黄鸟，浮天已白云。
辟兵书鬼字，神印题灵文。
因想苍梧郡，兹日祀东君。

06

《奉和夏初应诏》

魏彦琛 魏澹

虽度芳春节，物色尚馀华。
出帘飞小燕，映户落残花。
舞衫（袖）飘细縠，歌扇掩轻纱。
兰房本宜夜，不畏日光斜。

《奉和夏日晚景应诏》

杨师道

辇路夹垂杨，离宫通建章。
日落横峰影，云归起夕凉。
雕轩动流吹，羽盖息回塘。
薤草生还绿，残花落（疏）尚香。
青岩类姑射，碧涧似汾阳。
幸属无为日，欢娱尚（方）未央。